

- प्रधानमंत्री नरेन्द्र मोदी कह्यो- विधायी निकायां मांय महिलावां सारू आरक्षण ऊं लोकतंत्र और मजबूत बणेला।
- भ्रष्टाचार निरोधक ब्यूरो जल जीवन मिशन घोटाला मांय आरोपित पैली वाळा आई.ए. एस. अहलकार सुबोध अग्रवाल ने दिल्ली ऊं गिरफ्तार कीनो।
- एशियन बॉक्सिंग चैंपियनशिप मांय भारत री महिला टीम सोना रा चार तमगा समेत 10 तमगा जीत्या-टीम री सदस्य कोटा री अरुंधति ई सोना रो तमगो हासिल कीनो।
- राज्य मांय आंधी-बारिश रो सिलसिलो रूक्यो-आवता कुछ दिनां मांय पारो 3 ऊं 4 डिग्री सेल्सियस ताई चढ़बा रा आसार।

000

प्रधानमंत्री नरेन्द्र मोदी कह्यो है के विधायी निकायां मांय महिलावां सारू आरक्षण बगत री मांग है। एक वीडियो संदेश मांय खास लेख रो जिकर करता थकां प्रधानमंत्री कह्यो के महिलावां रा आरक्षण ऊं जुड़्या खास बिल माथे चर्चा अर वां ने पास करावण सारू 16 अप्रैल ने संसद रो सत्र बुलायी ज्यो है। श्री मोदी कह्यो के महिलावां सारू आरक्षण ऊं लोकतंत्र और मजबूत बणेला। प्रधानमंत्री कह्यो के साल 2029 रा लोकसभा चुनाव अर आवता बगत मांय राज्यां मांय व्हेवण वाळा विधानसभा चुनाव महिलावां सारू सीटां रा आरक्षण रा प्रावधान सागे व्हेवणा चाहिजे।

000

लोकसभा अध्यक्ष ओम बिरला कह्यो है के विधायी संस्थावां री सार्थकता अर तर्क सागे चर्चा ने बधावण सारू मोट्यार सदस्यां ने विधायी नियमां अर प्रक्रियावां री जाणकारी देवणो जरूरी है। वे आज गोवा मांय 'राष्ट्रमंडल संसदीय संघ' भारत क्षेत्र रा जोन-सात रा पहला सम्मेलन रा उद्घाटन सत्र मांय बोल रह्या हा। श्री बिरला कह्यो के युवा विधायी सदस्यां री सक्रिय भागीदारी ऊं साल 2047 ताई 'विकसित भारत' बणावण रो सपनो सांचो कर्यो जा सके है।

000

दो दिन रा ई सम्मेलन मांय कारोबार, सैर-सपाटा, शहरीकरण अर आब-ओ-हवा सरीखा खास मुद्दां माथे विचार कर्यो जा रहे है।

000

कृषि अर किसान कल्याण राज्य मंत्री भागीरथ चौधरी कह्यो है के बागवानी रे जरिये देश रा खेती-बाड़ी हलका मांय बदलाव आ रह्यो है। वे आज नई दिल्ली मांय भारत बागवानी शिखर सम्मेलन 2026 मांय बोल रह्या हा। श्री चौधरी कह्यो के खेती-बाड़ी हलको लगातार मजबूत बण रह्यो है जो गांवां री आजीविका अर देश री खाद्य सुरक्षा री बुनियाद है। वे कह्यो के बागवानी हलको अब कृषि सकल मूल्य वर्धित-जीवीए मांय करीब एक तिहाई रो योगदान दे रह्यो है।

000

मुख्यमंत्री भजनलाल शर्मा कह्यो है के जयपुर मेट्रो रेल परियोजना रो दूजो दौर शहर रा विकास सारू ग्रोथ इंजन साबित व्हेला। वे आज जयपुर मांय मेट्रो परियोजना रा काम री प्रगति अर वां ने और बधावण रा बारा मांय अहलकारां सागे राख्यी ज्यी समीक्षा बैठक मांय बोल रह्या हा। मुख्यमंत्री ई परियोजना रा दूजा फेज री मंजूरी सारू प्रधानमंत्री रो आभार जतायो।

000

भ्रष्टाचार निरोधक ब्यूरो जल जीवन मिशन घोटाला मांय आरोपित पैली वाळा आईएएस अहलकार सुबोध अग्रवाल ने आज दिल्ली ऊं गिरफ्तार कर लीनो। ब्यूरो रा महानिदेशक गोविंद गुप्ता बतायो के एसीबी कोर्ट जल जीवन मिशन घोटाला ऊं जुड़्या ई मामला मांय फरार चार

आरोपितां रे खिलाफ गिरफ्तारी वारंट जारी कीना हा, ज्यीं रा तैत आ कार्रवाई करी ज्यी। अग्रवाल माथे जल जीवन मिशन रा तैत काम मांय ठेकेदारां सागे मिलीभगत ऊं फर्जी अनुभव प्रमाण पत्र अर कंप्लीशन सर्टिफिकेट जारी करण पाछे 960 करोड़ रुपया रा चुकारा रो आरोप है। गुप्ता बतायो के अहलकारां ने टेन्डरां मांय फर्जी सर्टिफिकेट लगावण री जाणकारी ही, जिण रे बावजूद दो फर्मा रे खिलाफ कोई कार्यवाही नी करी ज्यी। ई सागे ई 50 करोड़ रुपया ऊं बत्ता मोल रा टेन्डरां मांय जोड़ी ज्यी शर्त ऊं टेन्डरां री गोपनियता भंग व्ही।

000

राज्यपाल हरिभाऊ बागडे कह्यो है के विश्वविद्यालयां ने विद्यार्थियां री बुद्धि रा विकास सागे वां रा कौशल ने बधावण अर चरित्र बणावण माथे खास ध्यान देवणो चाहिजे। श्री बागडे आज अलवर रा राजर्षि भर्तृहरि मत्स्य विश्वविद्यालय रा छठा दीक्षांत समारोह मांय बोल रह्या हा। वे कह्यो के नुवी शिक्षा नीति रो मकसद नौजवानां ने खुद रे पाण ऊबा करण सागे नौकरी देवण वाळा बणावणो है। कार्यक्रम मांय 44 हजार ऊं बत्ती डिग्रियां दीरीजी अर होशियार विद्यार्थियां ने सोना रा तमगा दे र नवाजी ज्या।

000

उपमुख्यमंत्री दिया कुमारी आज नागौर जिला रा रेण मांय सतहत्तर करोड़ अट्टावन लाख रुपया रा खर्च वाळी सड़क परियोजनावां रा पूरा व्ह्या काम जनता ने सूप्या अर नुवा कामां री सरूआत कीनी। वे दो सड़क परियोजनावां रो उदघाटन कीनो अर एक नुवी परियोजना री नींव रखी। आं परियोजनावां मांय रेण रेलवे ओवरब्रिज अर मेड़ता सिटी-गोटन-आसोप गोला ने और बेहतर बणावण रो काम ई शामिल है। उपमुख्यमंत्री कह्यो के आं कामा ऊं अजमेर-बीकानेर बीचे आवण-जावण आसाण बणेला।

000

सलूबर जिला मांय लसाडिया अर आरे-सारे रा हलकां मांय बच्चां रा स्वास्थ्य री जांच सारू खास चिकित्सा दल बणायी ज्या है। अ दल स्कूलां अर आंगनबाड़ी केंद्रां मांय जा र बच्चां री जांच करेला, ताकि शंका वाळा वायरल एन्सिफलाइटिस रा खतरा ने टेमसर रोक्यो जा सके है। जिला कलेक्टर मुहम्मद जुनैद पीपी स्वास्थ्य महकमा ने हालात माथे लगातार निजर राखण सारू कह्यो है। वठे बीमारी रा असर वाळा हलकां मांय साफ-सफाई, धुंओ करण अर एंटी-लार्वा दवाई रा छिड़काव रो काम ई तेज करी ज्यो है।

000

मंगोलिया मांय व्ही एशियन बॉक्सिंग चैंपियनशिप मांय भारत री महिला टीम सोना रा चार तमगा समेत दस तमगा जीत र अव्वल रही है। ई टीम मांय कोटा री अरुंधति चौधरी ई शामिल ही। अरुंधति 70 किलोग्राम भार वर्ग रा फाइनल मुकाबला मांय कजाखस्तान री खिलाड़ी ने 4-1 ऊं शिकस्त दे र सोना रो तमगो जीत्यो। अरुंधति सागे मीनाक्षी, प्रीति अर प्रिया ई आप-आप रा वर्ग मांय सोना रा तमगा जीत्या। भारत ई होड़ चांदी रा दो अर कांसा रा चार तमगा ई जीत्या। जैस्मिन अर अल्फिया पठान चांदी रा तमगा जीत्या।

000

तीजी अंतर-जिला रेंज स्तर री पुलिस खेलकूद होड़ आज जयपुर री रिजर्व पुलिस लाइन मांय राख्यी ज्यी। विश्व स्वास्थ्य दिवस रा सिलसिला मांय व्ही ई होड़ मांय सात टीमां रा 112 खिलाड़ी तीरंदाजी, एथलेटिक्स, कबड्डी अर बास्केटबॉल समेत न्यारा-न्यारा खेलां मांय भाग लीनो। पुलिस आयुक्त सचिन मित्तल जीतण वाळी टीमां अर खिलाड़ियां ने तमगा अर ट्रॉफी दे र नवाजा।

000

प्रदेश मांय लारला करीब एक हफ्ता ऊं चाल रह्यो आंधी-बारिश रो सिलसिलो आज रूक ग्यो। आज हालांकि घणखर ठौडां मौसम साफ रह्यो, पण पारो सामान्य ऊं नीचे ई रह्यो। मौसम विभाग रे मुजब राज्य रा घणखर हलकां मांय आवता एक सप्ताह ताई मौसम साफ रहवण रा आसार है। हालांकि बीकानेर संभाग मांय 11 अप्रैल ने एक कमजोर विक्षोभ रो असर रेहवण री

संभावना है। महकमा रे मुजब आवता कुछ दिनां मांय पारो 3 ऊं 4 डिग्री सेल्सियस ताई चढ़बा रा आसार है।

000

राज्य रा मौसम मांय व्हे रह्या बदलाव रे कारण गेहूं री साखां री कटाई माथे असर पड़ रह्यो है। ज़ोरदार बायरो बाजण अर बिरखा व्हेवण रे कारण केई ठौडां पाक्योडी साखां आड़ी पड़ जावण अर खेतां मांय पाणी भर जावण ऊं किसानां ने नुकसान उठाणो पड़ रह्यो है। कोटपूतली- बहरोड़ रा सहायक कृषि उपनिदेशक डॉक्टर रामजी लाल यादव किसानां ऊं मौसम रा हालात रे मुजब कट्योडी साखां हिफाजत ऊं राखण री अरज कीनी।

000

हनुमानगढ जिला रा नौहर मांय विधायक अमित चाचाण आज लारला दिनां पड़्या ओला रे कारण व्हा फसल खराबा रो जायजो लीनो।

000

राज्य मांय मोबाइल वेटेरनरी योजना रा तैत मुफ्त नंबर 1962 माथे फोन कर र ढांढां रो घरां ई इलाज करायो जा सके है। ब्यावर मांय पशुपालन महकमा रा उपनिदेशक डॉ. विश्वास कुमार बतायो के जाणकारी मिलता ई डॉक्टर दवाइयां सागे मौके पूग र ढांढा रो इलाज करे है।

000